

Il Drun da Cuolm da Vi ed outras notizias



Reminiscenzas nudadas 1974 da Vigeli Beer, **Sedrun** (1892 – 1979)

Transcret ed elavurau da Tarcisi Hendry, Sedrun

Anno 1834, ils 17 d'uost allas otg uras entscheiva ei a plover entochen ils 20. Ei plover senza calar duront 48 uras. Las empremas 24 uras vegn negin **Drun**. Tschellas 24 uras vegn il **Drun** inconten senza calar. Allura cala ei da plover ed era il **Drun** cala scochemai da vegnir. A **Cavorgia-Sura** egl englar aunc oz numnaus "s'el **Drun da Cavorgia-Sura**" era quei drunet vegnius giu quei onn. Il vau ei oz carschius en cun pignola ed il prau da Lucas Cavegn-Gieriet ha la vischnaunca da **Tujetsch** cumprau e lai crescher uaul. Igl uaul retegn egl avegnir era quels drunets.

Quella malaura gronda haveva tuccau mo las vischnauncas da **Tujetsch**, **Medel** e **Mustér**, engiuvians nuotzun. Suenter quella malaura gronda anflan ins a **Cavorgia** sil pass d'in esch casa ina brev cun sequent cuntegn. "*Gnanc sin santeri anfleis vus ruaus suenter la mort, aunc leu stueis vus ir en la buglia, manegiau el **Drun**.*" Las dispetas ein pari stadas aschi cuzzontas ch'ins ha emblidau da raquintar als vegnentsuenter ils eveniments da pli baul. Anno 1954 serepeta quella malaura per cletg en duas gadas, ils 12 ed ils 20 dad uost. Era quels dis ei il **Drun da Cavorgia-Sura** vegnius giu. Suenter ina da quellas malauras di in vischin da **Cavorgia**, ussa eis el morts, negin sa seregurdar da druns si **Cavorgia-Sura**. Quei era in da quels descendents! Jeu dundel negina risposta. 1954, ils 20 d'uost haveva ei pluiviu diluvial entochen allas otg dalla damaun. Sin viadi cul tren a **Muster**, di in um passau: *Da quellas malauras negin che sa seregurdar*. Cheu aschunta era il bien mistral e capavel giurist: *Gie da quellas malauras negin che sa seregurdar*.

Cheu declarel jeu en fetg cuorts, mobein concrets detagls la malaura d'anno 1834, essend ch'ei veva per mia gronda dolor tuccau la gronda disgrazia da mes agens antenats. Il **Drun da Sedrun** midava mintgamai sia cuorsa. Avon baghegiar il bogn cuvretg era ei ina val encunter spunda davart **Sedrun** e sper il vegl santeri giuadora. Dalla punt da viafier enagiudora ein aunc oz clars fastitgs veseivels, ch'ils vischins da **Sedrun** e **Gonda** stuevan inconten empalar il **Drun** en lingia grada viers il **Rein**. Quella val encunter **Sedrun** haveva avon anno 1834 ina profunditad da 4-5 meters. Gest alla finiziun digl existent plaz da glatsch era la val normala circa 1.50 meters pli aulta che dalla vart encunter **Sedrun**. Duront malaura d'anno 1834 staupa il **Drun** il vau normal e volva sia direcziun en quest cantun dil glatsch per 45 grads viers **Sedrun** el vau pli a bass sco indicau sura e da leu en lingia grada viers il **Rein**. Magliond la val adina pli afuns encunter santeri vegl, il qual ins haveva aunc schau star bi ed entirs suenter haver translocou la baselgia per duas tiarzas anora. Anno 1691 entschiet a scarpar giu e baghegiu si. Da mesanotg han ins en tutta dracca cavau si vischals frestgs e satrau e translocou els. Ina suletta notizia el cudisch d'aur dalla pervenda secloma: La suletta casa da **Gravas** ei devastada. Ins sa concluder ch'il plevon, sur Giusep Hetz, eri gia lura empau malsauns (+1846) ed aunc ils gronds quitaus e panzieris per puspei empalar il **Drun** en siu vau normal. Ina outra notizia da **Berna** secloma: L'entira sola dalla **Val Tujetsch** ei vegnida inundada. Avon che emplenir si la val sut il stradun anno 1969, haiel mez mesirau ils aunc bein veseivels fastitgs da quella val. Pia dil stradun engiu 25 meters e vertical ina profunditad da 8.50 meters.

Da tgi era la casa giun **Gravas**? Dil basat da sura Vigeli Beer ha la carschenta aua menau naven casa e clavau. La casa ei ida biala ed entira entochen la siara dil **Grep da Nislas** e lu sfraccada ensemen. Suenter la malaura anflan ins sin sulom casa il crucifix da stiva aunc total intact. Quei ei stau ina miracla, ussa en possess da frars Deragisch p.m., vul dir dils artavels a **Sedrun**. Dapli disfatz quitordisch tschaveras prau grass ed ussa ei mo pli ina gronda garvera.

Il possessur dala casa da **Gravas** era il bab da sur Bistgaun Beer morts a **Cuera** ils 24 da fenadur 1899 el spital dalla crusch. El ei satraus alla spunda dalla **Cuort**. Sur Bistgaun Beer ei staus plevon a **Ruschein** (1858 - 1875). Cun siat onns serenda miu bab a **Ruschein** entochen ord scola e lu a pei sur

il **Gelgia** a **S.Murezi** per far igl emprendissadi da scrinari, vul dir mobillas, escha, finiastras etc. A **Ruschein** tier igl augsegner sesanflavan in aug Mudest Pfister-Beer ed ina sora da sur Bistgaun. Ella haveva giu maridau in minister en l'**Italia**. Duront las revoluziuns da lezs onns eis el stulius, probabel assassinaus. Aunc enzatgei davart miu basat. El ei morts a **Ruschein** cun 87 onns. El era staus in fermezia um. El luvrava buca pli, haveva denton marveglias co ils umens lavurien si las sorts, sco ei vegn aunc oz luvrau si en la **Val Tujetsch**. Havend tschun umens buca dumignau ina buora, supplichescha el da schar empruar persuls. E pren mira, el damogna la buora bials e persuls. Aunc quei onn eis el morts da serrau il schliet. Il basat cun in auter cumpogn ein stai ils sulets ch'ei arrivai sauns e vivs a casa suenter la gronda baraccada a **Rehanau** duront l'uiara dils Franzos anno 1799. Els ein serendi a casa senza schigliar il bien vin dils Plantas dil casti da **Rehanau**.

Sur Giusep Hetz damonda suenter la malaura gronda d'anno 1834 il mistral dalla **Cadi** per la lubientscha d'astgar collectar ella **Cadi** per ereger ina ustonza encunter il **Drun**. Quella ustonza ei vegnida finida 1837. Sur Giusep ei morts anno 1846. Sco siu bab ha raquintau han ins per saver entscheiver cun l'ereziun dalla ustonza puspei stuiu cavar da niev il vau ch'era stupaus. Per far quella lavur han ins schau ir tut l'aua dils mulins.

Da anno 1935 han ins ord spir spargnar e per munconza da pli vasta capientscha schau ira alla malura la gronda part da quella bein baghegiada ustonza. Quei model d'ustanza fuss stada il dretg muossavia per las caras inutilillas lavurs dils davos onns.

Duront baghegiar las punts dil **Drun** cun scarpas anno 1863 - 1864 han ins duvrau la cruna da sura ustonza sco via da transit al plaz dad explotar material per las scarpas dalla punt gronda e pintga. Suenter ei restau in bi pastget, uss cuvretgs cul plaz da glatsch. Sco buobet da diesch onns havevel in regl per da tuttas sorts experiments sin quei plaz. Quei tut mo en miniatura, ils quals ein sefatgs valeivels ella practica suandonta, vul dir spargnau studis e lavur.

Scrutaziun dil Drun da 1834

Il **Drun** ei seformaus entras numerus sbuaus exteriurs. Sfindaglias ella alp **Cuolm da Vi** eran negliu veseivlas. Sco pign pastur a **Valtgeva** ed a **Cungieri** havevel jeu dressau mes animalets fetg bein. Per quei haiel giu fetg bia temps liber per da tuttas observaziuns. Il pli prigus toc ruinas dalla val dil **Drun** haveva lu mo sbuaus exteriurs. Cun grond levgiament haiel saviu veser cun mes agens egls da 1905 naven co quei toc territori carscheva en totalmein.

L'existenza cloma mei ord la **Val Tujetsch** per far emprendissadi da 1910 - 1913. Dapli lavurel jeu sco luvrer da stagiun a **Tavau** da 1915 - 1928, mintgamai dil zercaldur entochen il december. Igl ulteriur temps erel jeu a casa vid miu mistregn e puresser.

Anno 1917 dat ei a **Tavau** ina stermentusa nevada. Neiv compacta, gest sco a **Sedrun** anno 1951. Exepziunalmein sundel staus a **Tavau** entochen il mars, muort gronda lavur vid baraccas dad uiara per l'**Italia**, **Frontscha** ed **Engeltiara**. Era a **Sedrun** haveva ei stermentusa nevada. Tavau veva da quei da dus meters neiv greva e compacta e la temperatura muntava da minus 35 grads.

Sco miu collega Toni Berther-Deplaz ha saviu declarar a mi eis el staus starler si **Cuolm da Vi** anno 1917. Quei onn seigi stau fess ual mo ch'ins encurschevi la futura gronda sfendaglia da **Cuolm da Vi**. Suenter eis ella sefess adina pli e pli fetg. Sco sura remarcau era il territori sut la sfendaglia ni fessa carschius en totalmein cun pastg, exepiu enzacons grugns senza humus. Enqual ruinet selaian constatar suenter anno 1917. Sempla gliend indigena haveva la perschuasiun, ch'ei savessi culs onns sbuar giu quei toc **Cuolm da Vi** e caschunar ina pli gronda catastrofa. Il cuors d'existenza sforza era mei cun puresser e mistregn da far fein a pastg sco ils auters e quei si **Pala Gronda**, gest visavi quei grond territori en prighel. Denter far fein ha ei adina dau detgas pluidas. Secapescha ch'ins segava aschispert sco ei calava da plover. Ord la canal sut la fessa giudora ch'era aunc buca sbuada giadora, haiel cun mes agens egls saviu constatar co in grond dutg culava ord la tiara e dalla plaunca giudora suenter mintga pli gronda plievgia. Ei deva gia daditg sulegl, ch'ei curreva aunc adina aua dalla plaunca giadora, mo adina pli pauca entochen calar si dil tut. Quei ei adina serepetiu entochen la neiv gronda anno 1951.

La stad 1951 ascendel jeu il **Cuolm da Vi** da **Sedrun** atras ils mises da **Cungieri**. A **Cungieri** haiel era observau moviments sur **Val Custeri**. Quels moviments ein derivai da surproduziun dad aua da neiv ed era entras negligir da tener aviart il foss viers sera da circa in meter afuns. Ussa era el carschius en. Quel ei staus eregius da nos vegls aposta per far calar ils **Drunets** dalla **Val Ruinatsch** che arrivavan perfin entochen giutier la via cantunala dad oz.

Entras sondaziuns duront baghegiar anno 1925, haiel mez saviu persecuitar il decuors da quels

drunets d'avon onns. Il mantener quei foss ei ina necessitad per prevegnir ad ualti gronds donnos explosivs. Enconuschel quei territori gia sco pign pastur e la natira ha adina luvrau tuttina. Ascendel il **Crest d'Alp** entochen sum **Pala Pintga**. Oz ei quei gest il plaunterren dad ustria da **Cungieri**. Cheu observel jeu ina pintga tschessada, vul dir ina canaletta en quella pintga foppa ed en direziun miezdi encunter mesanotg. Quei pastg era buca scarpaus ni interruts da moviments dalla tiara. Ascendel vinavon e negliu ein moviments veseivels entochen tier sfendaglia gronda. Quella haveva novs fastitgs da fess la tiara. Ei fuva fess da niev per otg meters e miez viers sera. Medemamein ella medema dimensiun viers damaun. Mo negina aua che cuora dalla plaunca giadora sco avon. Il crest giusut muossa pliras interrupziuns da terren. Suenten haver miserau las novas sfendaglias, descendel jeu dil trutg giuado el plaun pli a bass che la fessa gronda. Quel ei all'entschatta ualti vasts viers miezdi. Jeu mon a catischond miniziusamein suenter novs fastitgs, serendel dil stretg trutg giadora en **Val Strem** e da leu lu encunter casa. Alla entschatta da quei plaun e per dus meters naven dalla spunda dil **Gendusas** ed en direziun encunter sera, semuossa il terren interruts sin ina lunghezgia da tschun tochen sis meter.

Anno 1952 semuossa ei en miu tschaler sera-mesanotg en il mir encunter mesanotg fastitgs da bletsch e mintga onn mender.

Anno 1954 ascendel jeu puspei il **Cuolm da Vi** per far controlla. La fessa sur Val Custeri era buca seslargiada, mobein carschida en. La fessa gronda si **Cuolm da Vi** era buca rutta en cun pli bia terren direziun sera-damaun, persuenten s'aviarta per treis meters; pia in meter ad onn. Quei ei stau il motiv che quella platta interna che empalava l'aua ord la tiara e dalla plaunca giadora era rutta e l'aua ei sfundrada fetg afuns e sut la val dil **Drun** ora viers **Sedrun** ed en miu sulom-casa. Cheu schai la greva sligiazion dalla sfendaglia da **Cuolm da Vi**. Anno 1954 era quella pintga fessa giu el plaun buca carschida en.

Anno 1956, suponend che la canalisaziun dil vitg da **Sedrun**, che va sper mia casa giadora seigi defecta, fetschel jeu in foss d'emprova sper nuegl da Gion Antoni Monn, exact ella cantunada miezdi viers mesanotg. Jeu cavel il foss igl emprem vertical afuns giu sin il bischel da canalisaziun e quei senza fastitgs. Suenten pli afuns encunter sera per contonscher la suponida lingia d'aua che va en mia casa. Sin treis meters e siatonta afuns anflel jeu aua currenta e dundel part a Cuera. Ei arriva igl expert dil laboratori chemical cantunal, signur Ignazi Beer. Nus fagein emprovas en tuttas casas sur mia casa cun color blaua. Quellas auas sesvidan all'extrada senza tucrar l'aua anflada. Igl expert constatescha che quella aua derivi giu dal cuolm e buca dalla canalisaziun. Uss sedecidel jeu da far in drenadi, ina stolla viers existent plaz dil glatsch. Quei tut cun lavur miniziusa a maun. Tagliel atras las differentas cuvridas dil temps glacial e fetschel cheu positivs observaziuns. Mond quella lavur mo plaun vinavon, dat ei era enqual urezi gest sur fessa gronda a **Cuolm da Vi**. Suenten quater uras d'in tal urezi e dracca crescha mia fontauna. Quei cass serepetta pliras gadas e quei cun ina preziosadad dil medem temps. Quella aua che percuora sut miu sulom casa ora; ei denton sesalzada empau cun buca aschi grond donn sco all'entschatta, mobein fetg d'engrau per far observaziuns che appartegnan a treis cumplacadas spartas, la tecnologia, la geologia e la meteorologia. Ils mussaments ein en mia casa positiv eruibels.

Ils emprems onns haiel jeu saviu constatar, che entras sederscher material giu el funs dalla fessa, ha l'aua in temps calau quasi diltut. Quei ei serepettiu duas gadas e suenter mai pli. Ton meglier saiel jeu observar il cuorer aua da malaura ni da schetg. Savess ei dar draccas diluvialas en quei territori, lu po l'aua buca sesvidar e quei territori sloppa. Dad ei nevas pli grondas, cun trenta grads freid e dapli, sche seformescha ei en quella gronda sfendaglia in grond e massiv glatsch e quel arva puspei il terren sin explodir. Ussa ei sura vau vertical en sfendaglia aschi lartgs per auas normalas, ch'ei po dar negin retegn pli.

Anno 1967 puspei controlla dalla sfendaglia a **Cuolm da Vi**. Tier tut quei moviment ei il terren encunter spunda da **Gendusas** staus eri, ni sluppaus ni tschessaus. Mo per mia fetg gronda sorpresa ei in toc terren en fuorma da trianghel dalla vart miezdi tschessaus cun pastg e tut giu en la sfendaglia. Quei toc formescha in cugn che arva la sfendaglia medemamein sco il glatsch entras la niev.

Il **Cuolm da Vi** consista ord pliras parts. mintga part ei dividida, sco per exempel ina platta da betun. Ils emprems onns era l'emprema platta intacta e l'aua sesvidava ordeifer dalla plaunca giadora. Dapi anno 1951 ei quei tut semidau. Anno 1969 fa in catschadur attents mei, ch'ei seigi puspei sefess da niev si **Cuolm da Vi**. Zatgei temps avon havevel jeu udiu il suandont da giuvens indigens el Hotel Cruna: Nus havein schau dar giuaden crappa en ina ruosna ed ei ha tunau d'aua.

Il davos di avon che serrar la sutgera da **Cungieri**, ascendel puspei il **Cuolm da Vi**. Haiel prest

anflau la fessa nova e plinengiu la ruosna ch'ils giuvens havevan schau dar giuaden crappa. Jeu emprovel cun dus craps. Gl'emprem croda afuns, sigliend d'in crap a l'auter cun in ritmus dad otg tochen diesch meters e setschenta amiez in lag sutterran. Ei tuna gest sco ina frida rebattenta cun in grev utensil sin in baun da nosa baselgia, quei mument ch'ella ei totalmein vita. Il secund crap gartegia para ei mo la riva da sura lag sutterran senza il rebattem solemn d'avon. Suenter sura experiments descendel da trutg giudora el plaun pli bass per observar quella fessa pintga gia dapi anno 1951. Lura haveva quella ina lunghezia da tschun tochen sis meters. Quella part encunter miezdi era buca tschessada. Fetschel cheu puspei ina nova scoperta. Il terren denter fessa e spunda da Gendusas era tschessaus per 35 centimeters. Motiv ei, cheu ha ei seformau in dartgair. Quel tschetscha guaden plaunet tut l'aua da quella spunda e lava cun quella caschun giuaden en la profunditad quei material che maunca alla surfatscha da quella foppa.

Ins patratgi da 1951 - 1969. Sura moviment ei ius aschi plaun, che quella spunda verticala po incuntin surcrescher cun pastg. Quei ei ad in giuven senza pli liunga e miniziusa exprientscha gia dapi decennis ora ina nuncapeivladad.

En in auter discuors cun dus cavacrappa exprima in: Jeu sundel ferm perschuadius, essend quei territori en moviment, ch'ei seigi cheu suten in lag sutteran.

Il suttascret Vigeli Beer, vegl meister-lennari, definescha il sura fatg sco suonda: Quei lag sutteran schai sin emprema platta aunc intacta. Il pli grond prighel exista ei duront ina pli liunga dracca diluviala duront la stad. Anno 1927 ha ina semeglianta dracca caschunau en las vischnaucas da **Sumvitg** e **Breil** grondas boas cun siat mortoris. Buca exlaus ei ina bova en sura territori il meins da matg cun marschauna e draccuna cumbinada.

Duront igl emprendissadi a **Cuera** haiel fatg atras ina da quellas malauras il matg anno 1910. La **Plessur** ord il **Scanvetg** e la **Landquart** ord **Portenza** han gliez onn devastau fetg bia. La medema malaura ei era stau quels dis en **Val Strem** e si **Cuolm da Vi**. Tier in pei dalla punt da **Camischolas** haveva ei entschiet a magliar il fundament. Sentelli haveva gl'entir **Cuolm da Vi** gliez onn neginas fessas, pia buca il prighel hodiern, entras sbuaus giu dil **Cuolm da Vi**. Mintgin dils territoris numnai sa independent in da l'auter sluppar e sbuar giu. Era san els en in mument comunabel scarpar la suletta preit crap che sparta quels dus territoris numnai.

Allura pauper quels a val tscheu giu! Igl onn 1970, en discuors cun Johann Batista Columberg, capoluvrer dalla firma Murer SA da **Sedrun**, pervia da prighel per bogn cuvretg viers **Drun**, rauenta el il sequent: Duront cavar fundament per restaurant dalla sutgera si **Cungieri** viers sera, vul dir en sum **Pala Pintga**, eis ei vegniu neunavon ina sfendaglia. Jeu damondel el: Schai il mir sin la sfendaglia? El rispunda: Na, il mir schai sin terren massiv e la sfendaglia ei dador il mir.

Tier mias precisas retschercas anno 1951 saiel seregurdar fetg bein: En quei liug era ei in pign cal da terren, mo buca interrut il pastg. Danunder deriva quella sfendaglia?

Seregordel duront ils onns da scola ch'il **Plaun Cungieri**, prau ni pastira encunter il **Drun**, ei tschessaus ni sbuaus giu varga 3000 m³. Calau da sbuar giu ha ei per cura ch'il **Drun** ha giu magliau afuns en in letg da greppa. Quei era tut terren darschelaun. L'emprema tschessada da **Salaplauna** sut **Pala Pintga**, aunc oz veseivla, ei stada anno 1907. Avon encurschevan ins en quella plaunca negins fastitgs da greppa.

En gl'entir territori da quei remarcabel crest cun **Pala Pintga** haiel buca viu fastitgs da fessas anno 1951, schegie che quella tschessada sut il crest anno 1907 haveva giu privau in bionton sustegn per quella plaunca.

Pia vegn en damonda igl onn 1917. Tier lezza neiv gronda sto ei esser sefess sisum **Pala Pintga** e suenter semuentau mai pli. Quei territori ei ussa buca malsegirs pli, essend che la gronda terrassa dalla ustria cuviera quella fessa. Il **Cuolm da Vi** ha era quei onn entschiet a sefender. Mo ina stremblida tier ina grond erupziun dil **Cuolm da Vi**, pudess forsa metter en moviment quei toc terren, vul dir senza sbuar giu il restaurant. La situaziun muossa che quei ei pusseivel.

Appartenet il Drun da Bugnei, sco el vesa ora oz

Lez consista ord sbuaus exteriurs. Atuns bletschs cun suandontas scheliras da trenta grads e varga, arvan duront la marschauna entira greppa ni greppaglia, la quala croda incuntin toc per toc a val. Entras grondas nevadas e cufas sa ei sesviluppar osum igl ur dils territoris horizontals, pia mintgamai sisum las teissas spundas dalla **Val Bugnei** al pei dil **Cuolm da Vi**, grossas plattas da neiv che fuorman in tetg sur quellas spundas ora. Gia il meins schaner e fevrer san quellas plattas, avon che vegnir la marschauna, sefender agl ur massiv dil plaun suren e caschunar ina gronda lavina da freid.

Ina da quellas lavinas eis ei stau ils 20 da schaner anno 1951. Quella ha scuau giuadora l'entira **Pala Quadra** cun **Plaunca da Rotz** culla biala pignola giuvna e scapescha era plontas carschidas. Lezzas cun cuscha entira entochen tschien meters sut stradun cantunal. In bintgun da siat meters sidretg, vul dir altezia, e sissonta centimeters grossezia ha formau ina biala interessanta petga encunter scarpa da punt **Bugnei** davart dil vitg da **Bugnei**. Il grond cusch da dus meters paradava sco tetg da quella exact verticala petga.

Plattas, cuflaus da neiv che rumpan per ordinari giu per da marschauna han per ordinari in gries glatsch onsum. Quella frida verticala da quei dir glatsch spatrogn la spunda bein carschida en taluisa, ch'ei sbova giu plaunet egl ault entochen sisum la spunda agl ur dil plaun suren. Ils 20 da schaner allas endisch dalla notg ha quella gronda lavina traversau las duas punts da **Bugnei**. La passarella dalla punt da viafier viers mesanotg era curclada cun ina dira cozza da circa 1.50 meters ault. Ins paregli la forza da quei buff dalla lavina. En quella scarpa da neiv era ei fitgau en dapertut tocca roma, buca travers, mobein horizontal, gest direcziun dalla lavina mesanotg viers miezdi.

Conclusiun Drun da Bugnei

Mender fuss ei sch'ils lags da **Cuolm da Vi** sur tegia veglia siadora s'emplanessen gnanc si duront plover ni luar la neiv. Per allura sesviluppess ei in prighel sco sur **Plaunca Tgamus** e **Ruinass dil Drun** leu speras.

Pro memoria

Igl iniziand per la uestonza encunter il **Drun da Sedrun** d'anno 1834, sur Giusep Hitz, ei il davos spiritual ch'ei satraus en baselgia. El ei naschius a **Tschamut** ils siat da fenadur 1773 e morts igl avrel 1846. Tier restauraziun dalla baselgia da s.Vigeli igl onn 1973, havein nus cavau si sias davosas restonzas. El era satraus sper altar da sontga Brida encunter il chor.

Sco pader Placi a Spescha scriva duront sia dimora a **Selva** sco caplon a **Selva** da 1809 - 1812, hagi el era saviu carmelar sur Giusep Hitz entochen sil **Pez Tgietschen** per admirar la bellezza da quei cuolm e scapescha era las bialas cristallas.

En ina outra cronica scriva pader Placi, ch'el hagi observau co ils vents lavurien, respectiv sut tgei pressium ei sesviluppeschi vents. Mo ch'el seigi staus sil **Pez Tgietschen** gest alla cruschada dils vents da nossa **Svizra**, da gliez menziunescha el nuotzun.

Cheu sa Vigeli Beer scriver il sequent: Duront far fein a pastg si **Pala Gronda**, haiel giu da tuttas auras. Egl ault gest al fil dalla **Val Stavlets** e **Pala Gronda** era ei in bi lag da nebula giu en l'entira **Val Tujetsch**. Suren tschiel blau serein. Quei di ha ei smuschignau tudi giu ella **Val Tujetsch**. Sur la nebula segavel jeu bi da schetg. Sur miu tgau circa duatschien meters sul **Pez Tgietschen** traversa ina sdrema nebula viers sera. Circa duatschien meters sur quella traversa in'outra sdrema da sera viers miezdi, e quei tut senza disturbar la sdrema suten. Quei ei stau gest sur la **Val Strem**. Cheu denter quella crusch haiel observau negins disturbis, pia exista cheu denteren ina aria dira buca movibla. Aschia sa mintga vent percuorer en mintga direcziun suten ni surora senza retenidas.

Las scrutaziuns da quels onns legran mei per part fetg e fan denton vegnir mei en outras spartas zun pensivs. Dieus diregia la natira, pia era ils elements destructivs e constructivs. Oz vegn snegau ni baghetallisau segirs mussaments da pli grondas erupziuns en sura territori. Tier emprems fastitgs dad anno 1917 naven han indigens gia allura temiu ina futura catastrofa mo plaunet vegnenta. Il carstgaun propona e Dieus dispona autruisa. Pia nies scaffider vegn sursegliu, vul dir, ei vegn fatg neginas segirezias per igl individuum, il concarstgaun.

Tier las grondas catastrofes da **Matmark** e **Longerona** haiel saviu perscrutar fetg bein il decuors da quellas catastrofes. Pia negina cardientscha en in Diu il scaffider da tut existent e che regia e diregia tut. Logicamein ei da taxar tier sura catastrofa ina gronda nunsufficiencia enconuschientscha fisica materiala. Pia emprema cundiziun avon che entscheiver a planisar sura lavurs. Pia tut mo quens da rendita senza segirezia dil concarstgaun.

Tier la gronda bova a **Goldau** dils 2-9-1806 han circa otgonta milliuns m³ satrau 457 persunas, 323 animals, 4 baselgias e capluttas, 11 casas e 220 clavaus. Ins ha era lura giu fatg attents sil prighel, mo il daner ha tschorventau la vesida dil prighel. Tier la gronda bova da **Plurs** en **Valtelina** ha ins era bia onns e decennis avon fatg attents sil prighel. Era leu ha ins viu mo il daner, ed il bien Diu emblidau, entochen la gronda erupziun d'anno 1618.

Siarel mias descripiuns sur dallas obseravziuns ed eveniments ed admoniziuns veglias e novas. Vegli Dieus tuttina menar ora tut sura descret sil meglier e buca sil mender.

Sedrun, settember 1974
Vigieli Beer